

Peqqissaasut Palliativ-imik nakorsaasinnaanermut ilinniaqqissinnaaneranguniarlugu immikkut aningaasaliisoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortamit, Doris Jakobsen, Siumut, saqqummiunneqartoq)

pillugu

Ilaqutariinnermut Peqqissutsimullu Ataatsimiititaliap

ISUMALIUTISSIISSUTAA

Siunnersuutip aappassaaneerpeqarnissaanut saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Lars P. Mathæussen, Siumut, siulittaasoq

Inatsisartunut ilaasortaq Hans Enoksen, Siumut, næstformand

Inatsisartunut ilaasortaq Karl-Kristian Kruse, Siumut

Inatsisartunut ilaasortaq Anders Olsen, Siumut

Inatsisartunut ilaasortaq Nikolaj Jeremiassen, sinniisusaaq, Siumut

Inatsisartunut ilaasortaq Agathe Fontain, Inuit Ataqtigiit

Inatsisartunut ilaasortaq Juliane Henningsen, Inuit Ataqtigiit

Ulloq 16. oktober 2013-imi siullermeerinerup kingorna siunnersuut Ilaqutariinnermut Peqqissutsimullu Ataatsimiititaliamut sukumiinerusumik suliarineqartussanngorlugu innersuunneqarpoq.

Siunnersuutip imarisaa siunertaalu

Peqqissaasut anniaatit ippinnarunnaarsarlugit nakorsaansaminut (Palliativ-behandling) ilinniaqqissinnaanerannut aningaasanik immikkoortitsisoqarnissaanik qulakkeerinnittoqarnissaa aalajangiiffigisassatut siunnersuuteqarnermigut siunnersuuteqartup kissaatigaa.

Kalaallit Nunaanni katsorsarneqarsinnaanngitsunik nappaatillit toqujartortullu anniaataasa ippinnarunnaarsarneqarnissaannut sullissisinnaalernissamik peqqissaasunik ilinniartitsiqqinnerup kissaatigineqartup kingunerissavaa.

Siunneruutip Inatsisartuni siullermeerneqarnera

Napparsimasut katsorsarneqarsinnaanngitsut taakkulu ilaqutaasa sullinneqarnissaannut peqqissaasutut sulisut piginnaanngorsarneqarnissaannut pisariaqartitsineq Naalakkersuisut akissuteqaamminni akuersaarpaat. Aammattaaq Kalaallit Nunaanni anniaatinik ippinnarunnaarsaalluni nakorsaanissamut immikkut ilinniarsimasunik neqeroorutissaqannginnera Naalakkersuisut paasissutissiissutigaa, taamaallaalli nunatsinni sumiiffinni napparsimavinni, Dronning Ingridip Napparsimavissuani kiisalu utoqqaat illuaini angerlarsimaffinnilu paaqqunarinnittarfinni anniaatinik ippinnarunnaarsaalluni tunngaviummik suliaqartoqartarluni. Hospice-mik pilersitsinissaq pillugu siunnersuutit kingunerisaanik misissueqqissaarnermik suliat Naalakkersuisut ingerlatiinnarpaat. Misissueqqissaarnermik suliame tamatumani anniaatinik ippinnarunnaarsaanermi pisariaqartinneqartut nalilersorneqassapput. Pineqartumut ataatsimoortumik nalunaarussiaq UPA 2014-imi saqqummiunneqassaaq. Aammattaaq siullermeerinermi Naalakkersuisut erseqqissaatigaat anniaatinik ippinnarunnaarsaaneq ilinniarsimasat akimorlugit suliassaammat peqqissaasunullu siunnersuummi siunnerfigineqartunut taamaallaat attuumassuteqarani. Peqqissaasunut pikkorissaanernik ilinniartitseqqittarnernillu periarfissaqareersoq ilanngullugu Naalakkersuisut ilisimatitsissutigaa.

Pissutsit piviusut taakku innersuussutigalugit siunnersuut Naalakkersuisunit akuerineqanngilaq.

Siunnersuut Ilaqutariinnermut Peqqissutsimullu Ataatsimiititaliami Siumup nalilertikkusuppa, apeqqutit arlallit sukumiinerusumik oqaluserineqarniassammata. Naalakkersuisut suliniutinik aallartitsisimanerat akuersaarlugu Inuit Ataqtigiit Atassutillu siunnersuut akuerinngilaat.

Tamanna tunngavigalugu siunnersuut Ilaqutariinnermut Peqqissutsimullu Ataatsimiititaliami sularineqartussanngorlugi innersuussutigineqarpoq.

Ataatsimiititaliap siunnersuummik sularinninnera

Anniaatinik ippinnarunnaarsaanissamut tunngasumi ilinniartitaanissamut pisariaqartitsinerit nassuiaammik naliliivigineqarnissaasa saniatigut hospicemik imaluunniit hospicemut assingusumik immikkoortortanik pilersitsinissaq pillugu misissueqqissaarnermik suliaq maanna ingerlanneqartoq tunngavigalugu nassuiaammik UPA 2014-imi Naalakkersuisut saqqummiussaqaalersaarnerat ataatsimiititaliamit qilanaarineqarpoq.

Nassuiaammik suliaqarnermut tunngatillugu Peqqissaasut Kattuffiata sapinngisamik attuumassuteqarfigisaanut peqataatinneqarnissaa aammalu tamatumunnga attuumassuteqarlutik suliallit allat isumasiuinerneq peqataatinneqarnissaat ataatsimiititaliamit ilimagineqarpoq, taamaaliornikkut siunissami suliniutissat suliannillu isumagininneq napparsimasunut qanigisaasunullu sumiluunniit najugaqaralarunik ataatsimoortumik

ilisimasaqarfigineqarsinnaaqullugit.

Aammattaaq nassuiaatissami suliassaqarfimmi siumut isigisumik pisariaqartitsinerup annertussusaa pitsaassusaalu eqqarsaatigalugit aammalu aningaasaqarniarnikkut pisariaqartitanik ersersitsisumik qulaajaasoqarumaartoq ataatsimiititaliamit naatsorsuutigineqarpoq.

Pineqartumi pingaarutilimmi Inatsisartut siuliisa aalajangersimasaat naapertorlugu suliaq Naalakkersuisut ingerlateqqimmassuk ataatsimiititaliami annertuumik naammagisimaarneqarpoq.

Anniaatit ippinnarunnaarsinniarlugit katsorsaasalernissamik pisariaqartitsinerup sammineqarnera siunnersuuteqartup aalajangiusimammagu ataatsimiititaliap qujassuteqarfigissavaa, suliamili ingerlanneqareersumi siunnersuummi anguniarneqartut Naalakkersuisunit suliarineqarnerat ingerlanneqalereernikuusoq ataatsimut isigalugu ataatsimiititaliap isumaqarpoq.

UPA 2014-imut nassuiaatissaq neriorsuutaasoq ataatsimiititaliamit qilanaarneqarpoq. Nassuiaatip pineqartup suliarineqarneranut nalilersorneqarneranullu atatillugu anniaatinik ippinnarunnaarsitsiniaanermi pikkorissarnissamik ilinniaqqinnissamillu ataatsimut pisariaqartitat pillugit oqallinnissamut isummernissamullu periarfissaqarluassaaq.

Ataatsimiititaliap inassuteqaatai

Oqaaseqaatit saqqummiunneqartut suliarlu ingerlanneqartoq innersuussutigalugit siunnersuut itigartinneqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiissummilu allassimasunut paasinnilluni ataatsimiititaliap siunnersuut aappassaaniigassanngortippaa.

Lars P. Mathæussen,
Siulittaasoq

Hans Enoksen

Karl-Kristian Kruse

Anders Olsen

Nikolaj Jeremiassen

Agathe Fontain

Juliane Henningsen